

ХАНТЫ ЯСАҢ



Основана
1 ноября 1957 года

13.01.2022
№ 1 (3589)

Йилуп ол пида!



Йилуп ол

Ешәк тәпәң мирәм,
Одэв ши сухәнл,
Кәши-мәшен хәщәл,
Йм нумсэн тәп ши вәл.

Мәрхәң нәрмен ат вәл,
Вояң-хүдәң мұвн
Вүдән ат щәхрийл,
Тәрүм түтән ат дәл.

Шәтши-мәнты әшен
Щүньши-хәлты ши вәл.

Валентина Соловар

П. Молданов верум хур



Югра мўвн вэлты тынӑң мир!

2021-мит ол ши етшӑс. Вантэ, интӑм коронавирус мӑш пурайн иса муй лӑңхасӑв, ши верлӑв еша па ширн тывсӑт. Лавӑрт вӑс, тӑп па ид ӑн питсӑв.

Мўвевн вӑлты мирева вӑн пӑмашипа. Итӑх ӑх тӑм мӑрыйн рӑпатайн вӑл, итӑх хуятӑт вӑлты хотӑт омӑслӑт, па хӑннехӑйт вӑлупсы ямшӑка верлӑт.

Ши кӑтн вулаң верӑт иши тывсӑт. Сӑрханл вошн ӑңкет па январемӑт давӑлман па вантман тӑйты тӑхи пӑншы.

Мўв илпи питы вуй па газ вӑты нивӑл тӑхийн рӑпата олнитсы. Ши тумпийн кӑт йилуп ишимӑщ нефтяной

утнӑн пӑншыӑн. Ши пӑта Югра мўвев мет вулаң вер – ям арат ол елды пела сопас верты.

Россия мўв хўватн промышленной верн мўң округев кимит тӑхийн вӑл. Социально-экономической ширн – хӑлмитн.

Катра вӑлты хотӑт эвӑлт йилуп хотӑта 3 491 хоттел ӑх касӑлсӑт. Шиты тӑм олн 264 арат йилуп ар нар-тупӑң хот омӑссы. И ол хӑт тылӑщ вўш эвӑлт иса пушхӑт хӑтл мӑр давӑлты хотӑта 100 процент арат январем яңхты питӑс. Шӑлта 1 761 арат йилуп рӑпата тӑхи версы.

Ӕрашты кӑсупсӑт олӑ-



нӑн путӑртты ки, па хон пелӑк Япония Токио хон вошн Олимпийской па Паралимпийской кӑсупсӑнӑн А. Батыргазиев, А. Гонтарь, А. Найфонов, З. Сидиков, М. Храмов мет яма ӧрашсӑт па олӑңмит тӑхет вўсӑт.

2021-мит ол, Россия луваттӑйн Наука па Технологийӑт ол немн пунсы. Ши тумпийн округев лыпийн тӑм олӑв «Кашӑң вер вӑйтты ола» постӑсы, рўщ ширн ки лупты, Знания ола йис.

2022-мит ол Югра мўвн Мир тӑлаң вӑлупсы давӑлты ол немн пунсы. Мосл, лӑлн кашӑң хӑннехӑ тӑлаң, яма вӑлты шира иса муй рӑхл щит верӑс. Лӑңхалум, лӑлн йилуп 2022-мит ол нынана тӑп уй, амӑт, ар ям йилуп вер ат тӑс! Ешӑк мир, тӑлаңа, уяңа-пишӑңа вӑлаты!

Округ губернатор не Наталья Комарова

Хӑнты ясӑңа тулмашӑтӑс:
Ирина Самсонова

Рӑт мўвевн вӑлты тынӑң хуятӑт!

Югра мўвев ийс пура вўш эвӑлт ташӑңа вӑл, тӑта шуши мир ийс верӑт давӑлман тӑйдыт, мўв илпийн ар таш вӑл. Югра хуши мет мутрайң па ӧрӑң, пӑлтапды па каркам ӧх вӑллӑт. Тӑта вӑлты мир ийс ширн вӑллӑт па йилуп верӑт сӑмӑңа уша павӑтлӑт.

Мосл лупты, шуши мирлӑв Россия мўвевн куль-

тура, вӑнтӑт, йиңкӑт, мўвӑт-автӑт давӑлты шира па па мосты верӑт ӧхтӑйн рӑпитлӑт. Нын унтасанӑн рӑт мирев ийс верӑт елды тӑлыт.

Нын рӑт мўвев давӑл-лӑты, рӑпата пелды сӑмӑңа вӑллӑты, ши пӑта вӑн пӑмашипа нынана.

Сӑм хӑрем вўш эвӑлт Йилуп ол ӧмӑңхӑтл пида

нынана ям вўща ясӑңат луплудм! Тӑлаңа, амтӑңа вӑлаты! Ӕшлӑнӑн тӑп ям хуятӑт ат вӑйтантиллӑт! Иса верӑт яма ат тывлӑт! Уяңа-пишӑңа, лӑхсӑңа, яма па ташӑңа вӑлаты!

Россия мўвев сенатор хӧ Александр Новьюхов

Хӑнты ясӑңа тулмашӑтӑс:
Надежда Рагимова



«Хӑнты ясӑң» па «Луима сӑрипос» газетайнӑн лўңӑтты ешӑк хӑйт па неңӑт!



Нын хӑнты муй вухаль мир ясӑңат сӑмӑңа тӑйлӑты, тӑм айкелӑң непек кашӑң пўш давӑллӑты па лўңӑтлӑты!

Тӑмхӑтл нынана йилпа юхтум 2022-мит ол пида ям вўща ясӑң китлум па лӑңхалум шиты лупты, хуты ин йилпа питты ол

пурайн мўң кашӑң пўш нӑмӑслӑв, муй ширн ямашӑк па хурасӑңашӑк вӑлты-холты ширӑт елды лӑшӑтты. Шеңк лӑңхалум, лӑлн тӑм йилуп олн нын нумӑслан ат тывсӑт, елды ищиты вӑщката па тўңширӑңа нын вӑлупсан ат мӑнӑс!

Тумтака, тӑлаңа па уяңа вӑлаты! Йилуп ол пида нынан!

Округев Дума хот кӑща лӑңкӑр хӧ, шуши мирӑт ассамблея тӑхи кӑща хуят Еремей Айпин

Хӑнты ясӑңа тулмашӑтӑс:
Владимир Енов

Ешӑк шуши мир!

Йилуп 2022-мит ол пида! Мўң шеңк лӑңхалӑв, лӑлн 2022-мит олн пӑлтап коронавирус мӑш йира ат мӑнӑс, лӑлн кашӑң хоттел ӧх тӑлаңа, кӑшиды-мӑшлы ат вӑс. Лӑшӑтум верӑт яма ат мӑн-лӑт, рӑпата тӑхетн иши тӑп

сӑмӑңа па хӑршия кашӑң утые ат тывл.

Атӑлт пӑмашипа ясӑңат ши шуши мирлӑва ястӑты лӑңхалум, мӑта ӧх ийс верлӑв тӑса вӑлӑт па ши верлӑва ай ӧхлӑв вӑнл-тӑлӑт, рӑт ясӑң сӑмлӑлн тӑйлӑт па щитн путӑртлӑт,

мўвев-йиңкев давӑлман шавилӑт, лӑлн мўң мирлӑв ийс вӑлупсы ал вӑтшӑсӑв.

Йилуп 2022-мит ол тӑп амӑт, уй аттӑл, лӑлн кашӑң хӑннехӑ сӑмӑң нумӑслад ат тывсӑт.

Вӑнлата йӧвум ӧх тӑхи кӑща Александр Константинов

Хӑнты ясӑңа тулмашӑтӑс:
Ирина Пословская





«Ханты ясаң» нэпекев лўңатты хуятат!

2022-мит олн мўң ханты газетаев 65 ол постал. Мўң уша верты ланчалўв, муйнын мўң нэпекев олаңан вайтлаты. Кашан газетайн ши олаңан и иньщасупсы ханшты питлўв. Юхи хашум 24-мит газетайн уша верлўв, хуйтат нух питлат. Юхды ясаң тыв китаты: **khanty-yasang-65@mail.ru**.

1. Хан «Ленин пант хўват» нэмпн газета пўншты олаңан поступсы ханшсы?



Йилуп 2022-мит ол ши юхтас. Вэнтат, лорат па пуслат доньша-ёнка ювмел. Хатл нувийн доньшиё ал ши вудийл!

Округн вэлты тынаң ёх!

Кашан хуята ланчалум лупты: хураман па сыстам мўвн ат вэллаты, вэна ювум хуятат хўв вэлупсийн ат малыйт, ай пушхит уяна па кашн-машды ат енуллат. Вўды тайты ёх ташдал ара ат йилат, вой-хўл велпаслаты ёха иши вэн уй. Ёнтасты па верантты неңат ханшаң, па хураман пурмасат ат верлат. Айлат ёх йис шу-

ши верат йма па тэса ат тайлал па лэщатлал, рэт ясаң лыв самелн па нумсэлн иса ат вэл. Йилуп олн нын нумса пунум вердан елды тэса ат манлат.

Округ луваттын вэлты тынаң ёха уй па хўв вэлупсы!

«Торум Маа» тахийн рэпитты не Раиса Решетникова

Лепас эвалт еплан ават, Лылаң союм пўналн эшиё, Лашкам мўвие, Хурам Ас хумпие. Мосты мўвем пелы вантты амаш, Самем хошум. Хутыса ма мўвем саманат тайдем: Опрощев па ащем мўв! Вўща вэла, вухаль мир мўвием! Вўща вэла, мосты мўвием! Вўща вэллаты, вэнтат па юханат!

Ма нын патана арилум! Вўщат, войт, тухлаң войт! Вўща вэла, велпас хё! Вўща вэллаты, ланхат! Вўща вэллаты, Югра мўван ёх! Йилуп ол пида! Йилуп уй пида! Елды ишиты йма рэпитаты! Рэт ёхлан пида уяна, тумтака вэллаты! Арсыр йм верат ат тывлат!

Югра мўвн вэлаң ариты не Софья Шесталова



Йилуп ол пида, ешак шуши ханты мир!

Вўща ясаң нынана китлум! Йм нумасн, ешак ёх, йилуп олэв посталэв. Тэса, тўна путартаты, лэхас ширн вэллаты. Ма ланчалум, ин йилуп олн нын вердан ат тывлат, йм пела ат кердалат. Нын хотдан ташн па летутн телыева ат вэллат. Ай

нявремат йма ат енуллат, веран неңат хураман пурмасат йма ат ёнтлат. Велпаслаты хайт йм вой юхи ат тэллат. Талаң ёш, талаң кўр! Уяна-пищан вэллаты!

Нуви сажум вош «Югра лылуптаты» тахи кэща не Ирина Фирсова

Ешак айкел ханшты хайт па неңат!

ол патан нынана тамхатл немасья хураман па нумсем эвалт манты тэс ясаңат лупты вўтьшалум. Шеңк ланчалум, лэлн талаң ёшн-талаң кўрн там нуви тэрум илпийн елды вэлупсы хураслан ат лэщатсаты. Там Найн-Вэртан мўвн нын нявремлан-хилылан Тэрум аңкийн-ашийн йм семн ат вантсыйт па иса пайлы эша ат ванлтасыйт.

Там йилпа юхатты олн нын лэлн сыр-сыр амаш па хурасан верат пида ат вайтантыйлсаты. Ймсыёва, вешката, катра пурайт иты, тўншираңа арсыр айкелат нын газетайна мўң мирлўв олаңан ханшсаты.

Ма вайтдем, хуты нын кашан хатл марн лэщатты рэпатайн ишиты арсыр лавартан шират тайл. Ханты муй вухаль мир кат газетайнан етты вер – шит шеңк вэн па вера мосты вер. Ши унтасн там йисн Югра мўвевн мўң ханнехуятлўв кўшкепа сыр-сыр айкелат лыв ёхлал олаңан, Россия хон пелак верум законат ширатн лэщатум йилуп поступсэт ушаңа-сащан паватлат. Кашан нын хушана рэпитты ханнехё округев луватн йма вайтла, вантэ, нын хулыёва мўң мирлўв кўтн айкелат акатлаты, щалта шитат

тэса газетая ханшлаты. Щалта юхи хашум ясаңлам хуша нынана луплум, лэлн нын елды пелы тывелт-тухелт округев па Россия хон пелкев луватн йнхты эшлан там нуви тэрум илпийн пайлы па тўншираңа ат мансат, арсыр йм ханнехё пида вайтантыйлсаты, мосты айкелат уша версаты па нух ханшсаты. Йилуп 2022-мит ол пида тамаш йм, тэс вўща ясаң нынана ма китлум!

Сўматвош шуши мир культура тахийн рэпитты не Любовь Вынгилева

Ханты ясаңа тулмащтас: **Владимир Енов**



Нын хўв вўш эвалт па ин тамхатл вэнтн округев ийха пилташум «Ханты ясаң» хантэт муй па «Луима сэрипос» вухаль газетайнан вэллаты, ймсыёва па тўншираңа елды лыв мирчалал патарэпитлаты!

Йилпа юхатты 2022-мит



Округ дума ветмит мирхот

Ван хәтлуп тыләщ 23-митн онлайн щирн округ дума ветмит мирхот вәс, щәта 30 вер нух вантсы.

Мирхот пурайн 2021, 2022 па 2023-мит олатн округ бюджет вух олаңан поступсы нух вантсы. Тәм 2021-мит олд округев вухәт 13,7 миллиард шойта енумсәт. Ийха лүңәтты ки, тәм ол бюджет вух – 263,2 миллиард шойт.

Тәм олд округ вухәт эвәлт 3,3 миллиард шойта шимәлшәк вух тәруптәсы. 2021-мит олд арсыр верәта 283,3 миллиард шойт вух мәнәс.

Щиты округ бюджет дефицит 17 миллиард шойт вуха шимла йис.

Иилуп поступсы вўсы,

щит 2026-мит олд ван хәтлуп тыләщ 31-мит хәтл вәнты рәпитты питл. Щиты 2021-мит олд Ас хәлты тыләщ 1-мит хәтл вўш эвәлт икет, мәта имилал, Россия мўвевн вәлты веритләт, тәп гражданство ән тайләт, хәлмит па елды па сема питты нявремәт пәта ищи «Югорской семейной капитал» вух ёша холумты веритләт.

Щи тумпи мирхотн и вер вантсы – 35 ол вәнты ими олаңмит нявремл, сема питты пурайн имухты 15 шурәс шойт ёша холумтәл. Имухты кәт муй па хәлум

пушхие сема питл, ки, кашәң, няврем пәта вух сухуптәлы.

Ими ки әнтәма йис муй па мәшитл, па ән веритл, няврем вантман тайты, щи вух икел, ёша павәтты веритл. Щи тухалпи «Расту в Югре» мойлупсы ёша холумтәл.

Мирхотн ашколайн нявремәт лапәтты вер олаңан путәртсы. Ин I па II группа мәшәң, нявремәт па айтедн мәшитты нявремәт тәрум пәта лапәтты питлйит.

Округ вәндтәты вер вантман тайты департамент кәща хә Алексей Дренин лупәс:

» Дистанционной щирн вәндтәты пурайн мўң

тәрум пәта мәты летут саты ар няврем тайты па ай тыләщ вух вўты хоттел, ёша компенсация вух сухуптәлүв. Щи тумпи 1-4-мит классәтн вәндтйилты нявремәт хәтл мәр ипўш тәрум пәта лапәтлйит. Щи вера федеральной па округ бюджет эвәлт вух мәнл, щирн дистанционной щирн вәндтйилты пурайн компенсация вух ән сухуптәлы. Олд мәр 4-10 шурәс няврем дистанционной щирн вәндтйилты. Щи пәта 90 миллион шойт вух хәщәс.

Юхи хәщум артән поступсы вантсы, муй щирн 2022-мит олд округ дума рәпитты питл.

Путәр хәншәс:
Людмила Гурьева

Муй щирн лавәлты неңәт рәпитләт

Тәм ванән «Югра» немуп айкеләт әкәтты тәхийн омбудсмена вәлты неңәт, щит хәннехә вәлупсы щирәт Югра луватн лавәлты не Наталья Стребкова, айлат нявремәт вәлты-холты хурасәт лавәлты не Людмила Низамова па лыв щирелн тынесты-ләтәсты хәннехәйт верәт округев хўватн лавәлты не Ирина Каск айкел, әкәтты па хәншты хуятәт пида мирхотн вәйтантийлсәт, лыв рәпата вердал олаңан путәртсәт.

Н. Стребкова лупәс, хуты тәм олд арсыр тәхетн рәпитты хәята муй неңәта немасья вакцинация щирн уколәт лоньщты мосәс. Щимәщ хәннехәә әл рәпата верты хуятәт, нявремәт вәндтәты, кәши-мәш верәт ймәлты, кәсты па культура хуши рәпатайт верты хәннехуятәт питсәт.

Ар пеләк хәннехә щитәт версәт, тәп муртәң хә ёх муй неңәт щимәщ уколәт ән лоньщтәсәт. Щи пәта лыв ймкәм арат хәтләта рәпатаел эвәлт кәщайдалн йира партсийт. Россияев хон пеләк Конституция законәт щирн немасья хәншман вәл: «Кашәң хә муй не лўв щирәлн тывелт-тухелт йәңхты веритл, лўв щирәлн нумәс тайл па лў-

вела мосты рәпата муцатл, па па утәт ...». Тәп ищи тәхийн ймсыева хәншман вәл, хуты мосты пурайн, хән арсыр хәннехуятәт иса хулыева мәшитләт, атәлт хуята ищи лўв вәлты-холты щирдал па па хәннехәйт вәлупсы щи мәш эвәлт лавләсты пәта, декситийлты мосл.

Рәпата эвәлт нух вўюм хуятәт сыр-сыр айкеләң, непекәт Наталья Стребкова хуца китыйлсәт. Щитәт пида лўв иса ар хәтл тәса рәпитәс. Щи тумпийн округев хәннехуятәт вәлты хотәт, тывелт-тухелт йәңхты па жилищно-коммунальной вухәт сухуптәты верәт олаңан иньщәссәт.

Щәлдта айкел, әкәтты хәйт па неңәт елпийн Югра мўвн айлат нявремәт вәлты-холты хурасәт лавәлты не Л. Низамова путәртәс. Лўв лупәс, хуты тәм ол мәшәң айлат хуятәта нәтсәт, ләдн щи ай ёх мулды вевтам вер лыв пиләда ал версәт. Лыв хуцәла вәлты па рәпитты социальной тәхет эвәлт вухәң нәтупсәт па йма ләщәтсәт.

Аңкилы-ашиды хәщум шәкащты нявремәта ищиты государства эвәлт арсыр нәтты верәт кәншсәт, ләдн лыв елды иса хулыева вәндтйилсәт.

Л. Низамова ясәңдал щирн, округев луватн тәм йисн сахарной диабет мәшәң верәт тайты няврем

шеңк ар. Щи пухәта-эвета вәндтәты тәхиләлн немасья летутәт кавәртты хот итәт пўншсийт. Щи тумпийн лўв пурайн щи нявремәта арсыр рўтыщәты тәхет ләщәтлйит.

Юхи хәщум кўтн мирхотн И. Каск па айкеләт верәс. Лўв путәртәс, хуты лыв щирелн тынесты-ләтәсты хәннехәйт верәт округев тўңщираңа па тәса тўңматәс. Вантә, пандемия мәш пурайн лывела рәпитты ищи шеңк лавәрт. Щи пәта ар пўш сўтытты верәта лўв йәңхәс, щимәщ сўт щирәлн тынесты-ләтәсты хәннехуятәт верәт па лыв рәпатаел лавләс.

Путәр хәншәс:
Владимир Енов



Ицки икет а́ктупсы

Ёмвошн ван хәтлуп тыләшн 10-12-мит хәтлән 14-мит пүш Ицки икет па Лоныц эвет а́кумсәт. Лыв Россия арсыр мўв сўңәт эвәлт юхәтсәт. Вошева иса 22 моньщ моньщты, моньщән вәлды ёх юхәтсәт.

Тәм олдн юхтум Ицки икет па Лоныц эвет па щира мир пида вәй-тантсәт, лыв яксәт па юнтсәт.

Ёмвоша юхтум ёх щит лыв мўвләдн, вошләдн кәсты щирн нух питум хуятәт. Лыв арсыр мўвәт эвәлт юхәтсәт: Москва, Санкт-Петербург, Казань, Оренбург, Благовещенск, Иркутск па Россия па вошәт эвәлт.

Югра мўвев эвәлт Ицки икет па Лоныц эвет Урай, Мегион па Сәрханл вошәт эвәлт вәсәт.

Якты хәр ван хәтлуп тыләшн 10-мит хәтлән, Парк Лосева луңты хәр тәхийн олңитса.

Россия мўв луват Ицки икет па Лоныц эвет тәм вошн тәп яксәт, күтләдн лыв кәссәт па щира, карты щўңкәт мухты. Кәсты каш тайты хуятәт, арсыр мўв сўңәтн вәлды ёх лыләң,

хур китыйлдсәт, муй тәхийн ванлдәсәт йилуп ол ёмәң-хәтла ләщәтум әмәщ верәт вән хәннөхәйта па нявремәт пәта. Щи лыләң хурәт тәп 15 минута мара ләщәтты мосәс.

Нух питум хуятәт, щит мет әмәщ верәт ванлдтум ёх, непекәтн мәсыйт, щитәм пәшта хўват китсайт.

Мет ям Ицки ики па Лоныц эви тәм олдн пириты ән питса. Тәм верәт ләщәтум ими Зинаида Мор пугәртәс:

» Тәнял олд атум мәш пәта тәмәщ Ицки икет па Лоныц эвет а́ктупсы ән верәнтыйлдса, карты щўңкәт мухты верты ищи ән питсәт, тәм верәт хути щимәщ пищәт мухты яма ән тывләт. Ям ёмәңхәтл тывты пәта тәмтәхета нявремәт па лыв аңкилад-ащидәл мосләт. Щирн тәп уша йил, мәта Ицки ики хил-неңәл пида няврем сәма верә мәстәлднән. Щи пәта



щитәм олдн мет ям Ицки ики па Лоныц эви пириты ән питса. Щи юкана тыв лыв мўвләдн тәнял олд нух питум ёх вохсайт.

Пугәр хәншәс па хурәт верәс:

Пётр Молданов

Муцтам кэртән җәнмәс

Нуви сәңхум вошн вәлты хәнты ими Римма Ильинична Карюкина Ас хәлты тылҗащ 4-митн 60 ола йис. Щит Муцтам кэртән җәнмум, тәса җәнтәсты па тыйты нә.

Тәм каркам хәнты нә 1952-мит олдн Муцтам кэртән сема питәс, щит Касум юхан хүват 15 километрайн вәс. Щәта ай пура олдәл мәнсәт. Аңкел Варвара Дмитриевна Юхлымова (эви опращ немл Ерныхова) Кещлор кэрт эвәлт вәс. Ащел Илья Ксенофонович Юхлымов Муцтам кэртән җәнмәс. Лүв вүды давадман рәпитәс, вой па хүл велпәсләты хәя вәс. Римма 1960-мит олдн Полнавәт воша ашколая вәндтәйлдты тәсы, интернатн вәс. Аңкел-ащел 1964-мит олд вәнты Муцтам хуши вәсәт, щәлдта Полнавәт воша касәлсәт. Илья Ксенофонович щәта Фрунзе немпи колхозн рәпитәс.

Римма нивл класс етшуптәс, щи юпийн ищи колхозн рәпитты питәс.

» Колхозн арсыр рәпата вәрсүв. Мисәт пәта турн, хәш юх тәтлясүв, мисәт пәссүв, ай мисәт лапәтсүв. Щиты рәпитсум, 1970-мит олдн ратива хүват Сәрханл вош олаңән хәдсум. Сүсн упем пида щив мәнсумн, рәпата кәншты ләңхасмән, тәп мүң диплом непек ән тәйсумн, хуйн рәпатая вүлүймән. Щирн училищайн вәндтәйлдты нумәсн юхәтсыймән. Хәлүм олд мәр вәндтәйлдсумн, хот питрәт олюпн нерты хуята йисмән. Щи юпийн ма Сәрханл вошн олд мәр рәпитсум, – лупәс Римма Ильинична.

Сәрханл вошн рәпитман 1973-мит олдн Р.И. Карюкина йама па тәса рә-

питмәл пәта «Победитель соцсоревнований» мевл посн катлуптәсы.

» 1974-мит олдн Полнавәт вошәма рүтшәты юхәтсум. Щи пурайн Нуви сәңхум вош омәсты олдңитсы, ма тәта рәпатая вүсыюм. Щирн юхи керләсум.

Ар хурамәң хот Нуви сәңхум вошн омәссүв – тухләң хопәт датты тәхи, кәт ашкола, «Газовик» немпи культура хот, «Дельфин» немпи мир певәлты тәхи, нявремәт ариты па нарәсты уәтн юнтты вәндтәты ашкола, пәльница.

Ма 1974-мит олд вүш эвәлт 1992-мит олд вәнты щи йилуп хотәтн хот питрәт нерман рәпитсум. Айдат пурайн ма арсыр вошәта хотәт омәсты китыйлсыюм, Тюмень, Тобольск, Игрим, Кев авәт вошәта, Сүмәтвоша яңхийлсум. Щи тумпи Касум вошн кәт нартупәң хотәт па Нуви сәңхум вошн ищи вәлты хотәт омәссүв. Хута мүң рәпитты тәхев әх хотәт омәссәт, щив китыйлсыюм. Щәлдта икәңа йисум, нявремәңләм сема питсәңән, щи юпийн арсыр вошәта ән яңхсум, Нуви сәңхум вошн тәп рәпитсум, – путәртәс Римма Карюкина.

Ар олд щимәщ давәрт рәпатайн лүв рәпитәс, кәшитты питәс, щирн нявремәт хәтл мәр тәйты хота рәпитты мәнәс. Лүв 11 олд мәр «Снегирәк» немпи



Р.И. Карюкина. Н. Рагимова вәрум хур

садик хотн воспитателя нәтман рәпитәс. Щәлдта рүтшәты мәнәс.

Ийха ки лүңәтты, Р.И. Карюкина 30 мултас олд мәр рәпитәс. Лүв ар олд рәпитмәл пәта «Ветеран труда» мевл посн мойләсы.

1980-мит олдн Римма Ильинична икия мәнәс, щит Владимир Григорьевич Карюкин. Лын кәт няврем әнмәлсәңән. Лилия вән эвән Җмвошн вәл па рәпитл, «Одри» немпи неңәт пәта тәхи пүншәс, щәта әпәт эвәтты, нерты па па арсыр щирн имета хурамәңа йиты рәхл. Михаил пухән Нуви сәңхум вошн вәл па рәпитл, кәт няврем әнмәлтәл.

Римма Карюкина ин рүтшуман хәнты ләмәтсух җәнтәл, хурамәң хәншет пида посәт, вейт тыйл. Пухәла нявремәңәл әнмәлты нәтл. Нуви сәңхум вошн шуши мирәт җәнхәтләта иса пүш вохәнтды.

Ин сема питум хәтләл па Йилуп олд җәнхәтл вүраңән Римма Ильинична ар йа па хошум ясәт луплүв! Уяңпищәңа, тәлаңа, йама хотәң әхләл пида ат вәлдәт! Йилуп олд нынана ар амәт, ар йама вер ат тәл! Кашәң хәтл Кәлдтащ Аңкийн давадман вәдәты!

Путәр хәншәс:
Надежда Рагимова



Айваседа юрн рэт эвэлт ими

Аган кэрта яңхмемн ма юрн ими пида вэй-тантыйлсум, щит Мария Паповна Сверлова, эви опрацнемл Айваседа вэс. Лүв мәнема вэлупсэл, па Аган кэрт олаңан путärtäc.

Лүвтэнлуптылăщ 10-мит хатлдан 1954-мит олн Юмаяха юхан хонаңан вэлум вүт кэртән сема питäc. Щит Сэрханл район Дарко-Горшково кэрт пүнәлн. Папа Пупевич Айваседа ащел вүды тащ лавлăc, Мария Петровна аңкел лүвела нётäc. Лыв семьяелн ар няврем вэс, итэх пушăхлал ай пурайн антэма йисät, тәп Полина па Мария эвенән хăщсă-ңан. Ащел Дарко-Горшково кэрт кăщя рәпитäc, әхät колхоз кăщя павäт-сы. Лүв вүды тащ лавäл-ты па вой велты ям хуята вэс. Щи пурайн ар вүды тăйсät. Вүды унтасн мосты пурайн Сытомино кэрт эвэлт хүл, Сэрханл воша тэтъясы, щäта комбинат хуца арсыр еплäң летут, хүл лүвät эвэлт лант вер-сы. Хүл лүв лантән вүлэт лапätсыйт. Арсыр еплäң хүл летутät дала китсыйт.

1970-мит олн колхозät йира вүсыйт, щи юкана хүл велты па мәты тăхет пүншсыйт. Ай кэртät ищи лäп тэхäрсыйт. Дарко-Горшково кэртäң хүл вел-пäслäты хуятät хоттел әхлал пида Сытомино кэрта касäлсät. Щи кэрта совет хот, ашкола, пель-ница, культура хот па па ичимäщ хотät тэсыйт.

Мария ашколая юхät-малн рүщ ясäң иса ән тăйс, щиты нәмälмäc:

» Олаңмит вәндтäты нөңем Мария Петровна Хорова вэс. Интернатн имухты әпätдäм луртсыйт, няр ухн едем яңхты вэс.

Вән сопекн мәсыюм. Рэт щирн путärtты ән рāхāc. Аңщасем ипүш юхтылăc, ма пелдема вантäc, щикүш лыкащäc па лупäc: «Щит вэлупсы хән!», па имухты юхи тәслä. Ас нопätты тылăщн юхи мәнсумн, па олн вән кер тылăщн юхлы тәслä.

Мария няд класс вән-ты Дарко-Горшково ху-ща вәндтылăc, 5-6-мит классäңан Тундрино кэртән, 7-8-мит клас-сäңан Горной кэртән, 10-мит класс Сытомино кэртән етшуптäслä. Щäта интернатн вэс, щив Ля-мина, Тундрино, Пим (ин Лянтор), Дарко-Горшково, Песчанное, Высокий Мыс па Локосово кэртät эвэлт нявремät тэтъясыйт.

Мария елды вәнд-тыйлты мәнäc, тәп аңкел лавärt мәшн юхätсы, щирн лүв юхи керлäc па рәпитты олңитäc. Елды тәрүм вантман тăйты вера вәндтылăc па Сытомино кэртән метеоролога рә-питты питäc. Еша Сэрханл вошн тухлäң хопät яңхты хотн рәпитäc.

1980-мит олн Аган кэр-тäң интерната нявремät вантман тăйты вохсы. Тäта лүв 1982-мит олн кэртäң депутата, әхät Совет хот кăщя лäңкär неңа йис. Щи пурайн Аган кэртән ар нүша вэс – нуви түт, ма-шинайт яңхты пäта кев әш äнтәм вэс. Щирн Мария Па-повна кэртäң кăщя пида щи суртät түнматты питäc.

Аган кэрт эвэлт хәлум верстайн ЛЭП вэс, щит эвэлт тыв нуви түт карты



М.П. Сверлова ләйңäl пида

келät талсыйт. 1987-мит олн кев әш верты олңитсы. Щи юпийн тыв машинайтн летутät, мосты пурмäcät па па угät тэты питсыйт. Мүв илпи питы вуй вүты компанияйт ун-тасн кэртән лапка, пел-вälды хот, культура хот, спорткомплекс па па мосты хотät, шуши мир тәрүм пäта хотät омäсты питсыйт. 1990-мит олн катра пурмäcät лавälды хот омäсты олңитсы.

Щи ям верät пäта юрн мир писатель хя Юрий Кылевич Вэлла вән пэмащипа лупты мосл. Хәнты тäта айлат әх ар-сыр рәпатайта вәндтä-ты тăхи вэс, ар хуят щит етшуптумел юпийн имух-ты рәпитты питсät. Мария Паповна Ирина эвел щäта ищи секретаря вәндтылăc па ин рәпитл. Анатолий Пельментиков ищи щäта юх, лүв нюхärtты вера вәндтылăc па ин вөтаң верäнтты хя йис. Тәп шаль, хуты щи тăхи лäп тэхäрсы.

М.П.Сверлова Аган кэрт олаңан ай тәс:

» 1618-мит олн велщи

Аган кэрт олаңан хәнш-ман вэс. Тäта Лейковät, Тырлинät, Юсипинät хәнты рэтät вэсät. Әхät Казамкинät па Покаче-вät тыв юхätсät. 1893-мит олн Аганской кэрт Аганинородной волос-тя Сэрханл округа То-больской губерния лун-ман вэс. 1920-мит олн Аганской сельсовет версы. 2003-мит олн Аган кэрт Нижневартовской райо-на лунäc.

Тәм кэртән Мария Па-повна нявремлал Ольга, Ирина, Анна па Иван сема питсät. Ин лүв яң хилы тăйл, енмälты нөтл.

2002-мит олн лүв пен-сияя мәнäc, тәп худна рәпитл. Рүтьшуман Ма-рия Паповна хурамäң ләмäтсухät өнтäl, щи вера аңкел эвэлт вәндтылăc. Ин айлат неңät өнтты вәндтäl.

Мария Паповна, йилуп 2022-мит ол пида! Тәм ол амät па уй ат төл! Тäлаң еш па тäлаң күр!

Путär хәншäc: Людмила Гурьева



Верăң ёх вән мирхот

Ёмвошн ван хăтлуп тылăщн 18-19-мит хăтлăтн «Точка кипения» немуп тăхийн «Югра хуца йис пурмăсăт верты верăң ёх» вән мирхот вăс, тăмăщ мирхот кашăң 3 ол верăнтылда.

Мирхота юхтум ёх Югра кăща грант вух унтасн аќăтсайт, щн вер немд «Хăнты-манси йис верăт: лылăң вълупсы». Тăм верн сыры лекцияйт лўнăтсайт, ёх верăң тăхия аќтăщийлсайт, ванлупсэт верăнтсайт.

Тăм вән мирхот, щит юхи хăщум вер, тыв аќумсăт мет ёшăң верăң ёх. Лыв округев арсыр тăхет эвăлт юхăтсăт, мăта мўвăтн худна йис вер нэмты ёх вълдăт, йис вер елды тэты мир вълдăт.

Ям вўща ясаң юхтум ёха путăртсăт «Югра йис пурмăсăт верты верăң ёх» кăща не Н.А. Молданова, Ёмвош округ-Югра думая пириум не Т.С. Гоголева, «Окружной Дом народного творчества» хот кăща не Е.Е. Исламуратова.

Олăң хăтлăн юхтум хуятăт Н.А. Молданова ясаң хэлăнтсăт, муй вўрн «Югра йис пурмăсăт верты

верăң ёх» немуп тăхийн мир рэпитсăт, муйсăр верăт лыв версăт. Надежда Анатольевна путăртăс, муйсăр нумăсн вълдăт тăм ёх, муйсăр верăт лыв нъл ол мър версăт.

Лўв юпелн ясаң тăйс искусствевед, Россия художникăт Союз хуца, искусствеведăт Ассоциация тăхийн вълты не Н.Н. Фёдорова. Лўв путăртăс йис верăт олăңан па муй вўрн щн верăт тăм вълупсийн яма тăйты. Этнограф, исторической наукайт кандидат, Югра наука ар вер верум не Т.А. Молданова тăм хăтлăтн увăс ёх йис верăт олăңан лупăс.

Тăм кăтнăн путăртсăнăн, муйсăр лавăрт суртăт вълдăт йис верăт йилпа лэщăтты тăхетн. Наталья Николаевна йис хурамăң пурмăс верты верăт олăңан ясаң тăс. Лўв лупăс:

» Тăм верăт мет мосты верăт, тăп тăмхăтл тăс хурамăт верты мир шим-



ла йис. Тăм мўң вълты вълупсэвн тăп тăта, тăм мир кўтн щимăщ верăт хăщсăт. Йис верăт лэщăтты ёх шимла йис. Па щн кўш хуты тăм верăт мет мўвева-йиңкева мăстăты верăт... Тăм верăт мухты хăннехă ил мўв тэрмев пилă пилтăщман въл, мўв луват ёх тăлаңа-яма мўв шавиты нумăсн вълдăт.

Тăс хурамăң йис пурмăсăт верлайт тăм мўвев-йиңкев миум утăт эвăлт: лўв, юх, пўнăң сух, нюки, тунты. Елды па лўв лупăс:

» Тăм йис верăт хăщдăт, хэн щн верăт и ёш эвăлт па ёша катлуптăлйит, эви

– аќкел эвăлт вълдтйыл, пух – ащел эвăлт. Вән ёх па тăрума мăнсăт ки, щирн лыв пурмăслад тăта хăщсăт, щн пурмăс па тэрма мăнум хăннехă нумăсн верум ут, мăнум хăннехă ёшн верум ут, щит ищи ёш эвăлт ёша катлуптум ут.

Тăм хăтл тăм верăт хăщты питсăт, тăх верăң ёх вълдэл, муй вўрн муй верты. Тăм хăтл итэх ёх вән вошăтн вълдăт, итэх ёх ай вошăтн, кăртăт эвăлт йира питсăт. Хăнтэт вухаль кўтн па арсыр мир кўтн вълдăт. Муйсăр пурмăс тăм хăннехăя верты. Щит тăп лыпи нумăс хэлăнтты мосл,





Йис ёх эвэлт юхтум лыпи нумас. Тәп ши нумасн ушәң, ма тәм вәлупсийн вәлты хәннехә мәта мүй-йиңк эвәлт вәлдум.

Татьяна Александровна па кәт вер олаңан пүтәртәс. И вер щит «Йис вәлупсы пурмәсәт па хурамәңа-тәса верум йис пурмәсәт». Кашәң йис вәлупсы пурмәс хурамәңа хән верәнтийлса. Лүв пүтәртәс, муйсәр поступсәт мүй луваттыйн тайлүв тәм верәт яма ләщәтты пәта. Йис вәлупсы и законәт тайләт, хурамәңа-тәса верум йис пурмәсәт па ши киньща аршәк нәпекәт мухты шавиман тайлдайт. Кимәт вер, щит «Йис вәлупсы верәт, йис вәлупсы пурмәсәт тыныты верәт олаңан».

» Хән йис вәлупсы тыныты питса, щирн шеңк ар хәннехә тәм вера напәтты питсәт. Ши пәта увәс ёх атма верум пурмәсәт иса тәхетн тыныты питсайт. Кашәң тәхийн тәм хәтл щимәщ ювра пурмәс шивәләдән. Ши пәта мүй йис вәлупсәв мира атум пел-

кәл эвәлт кәл. Йис вәлупсы пурмәса ювум вер па ши пурмәс тыныты вер – щит тәм хәтл лавәрт сурт. Ши олаңан мүйнева нәмәсты мосл. Ши күйш сыр-сыр нәпекәт вәлдәт, ишимурт йис хурамәң-тәс верлүв, йис вәлупсәв лавәлты пиц тәмхәтл ән тайлүв, – лупәс Т.А. Молданова.

Ищи хәтлән вән мирхотн ванлупсы вәс. Щәта тәса верум йис пурмәсәт олаңан пүтәр мәнәс па ёңта пәсанәт вәсәт: «Икет тәс пурмәсәт» (Н.Н. Фёдорова, Я.Н. Тарлин мирхот тәсңән) па «Имет тәс пурмәсәт» (Т.А. Молданова, М.В. Кабакова).

Ёңта пәсанәтн пүтәр мәнәс, йис пурмәсәт ай вошәтн муй вүрн тәса верты, муй вүрн вәнт кәртәтн сыр-сыр верәт ләщәтты мосл, муй вүрн ши тәхета нәтты.

Тәм мирхот мәнумн ма тәс ёшуп ёх пила пүтәртсум, щәта аршәк айлат ёх вәсәт, ши күтн Александр Айпин вәс. Александр – вүлды тайты



хә, Нижневартонской районән ай кәртән вәл, ванлупсыя лүв нохәр юх эвәлт верум юх онтуп тәс па кәт хүйв ан тәс:

» Ма ащем – Россия народной мастер нем тайл, – пүтәртәл Александр. – Юх пила ма айтәлн рәпитты вәндлсум, мәнәм әмәщ вәс ащем пәла вантты, муй вүрн лүв рәпитл. Тыв мирхота юхәтсум мир хәләнтты па мулды йилуп нумас уша верты па еллы ащем верәт тәты. Ма атәлт хән, пухем пила юхәтсум,

лүв ищи ма итема айтәлн иса верәт уша ат верләлэ.

Кимәт хәтлән тәм вән мирхотн йилуп ёх Правления па Экспертной комиссияя пирисайтпа и ёңта пәсан па верса «Муйсәр лавәрт вер йис пурмәсәт верты тәхийн Югра хуца тайлүв». Тәм мирхот етшумалн еллы тәм мосты верәт ләщәтты пәта иса пүтрум верәт яха и нумаса пунсайт.

Пүтәр хәншәс па хурәт верәс:
Пётр Молданов



Хүл дэщятты тәхи пүншсы

Тәм ванән «Ханты ясаң» газетаева әмәщ па путраң Сүмәтвошаң киникайт хәншты хә, оса верәт тәты хәннехә, атәлт хүл ведпәсләты вер сәмәңа тәйты хуят Леонид Бабанин мойңа юхтылҕас.



▲ Л.Л. Бабанин

Юхи хәшум олатн мүн лүв оңелдн нынана хәншсүв. Леонид Бабанин – вера әмәщ па рәпата пела сәмәң хуят. Лүв 1959-мит олдн Нижневартовской район Ларьяк кәртән сема питәс. Айтәлдн тухлаң хопн йәңхты хәя йиты дәңхас. Вәна ювмадн тухлаң хопн пәрләты хуята йис. Еша вәс па 30 ол луваттәйн шуши мирлүв күтн вәдты-холты дәңхас. Вантә, киникайт хәншты хәя мүн увәс мыв вәлүпсәв, йис верлүв шеңк әмщәт. Хутыса хәнтылүв, юрнлүв вәлдәт, муй щирн вой-хүл ведпәсләләт па щит эвәлт арсыр дәтутлад дэщятләт, сыр-сыр пур-мәслад верләт, лүв иса яма вәлдә. Щи тумпи хәнты па юрн ясаңңән ищи вәндтәс. Щи пәта мүн хушева мойңа юхтылҕалдн мүн амәтлүв. Ийха шуши мир вәлүпсәв, йис верлүв, нүшайлүв олаңән ясаңтәлүв.

Леонид Леонидович мүйева амтәң ай павтәс.

Мәтты, тәм ванән Сүмәтвошаң, учебно-курсовой комбинат хуца хүл дэщятты тәхи пүншсы. Кәщя йилпа верум тәхийн Леонид Бабанин вәд. Щит лүв нумса юхтәс хүләң хот омәсты, лүв унтасәлдн щит вер тывәс.

» Хүл ведпәсләты вер мүйева әмәщ, щит шеңк мосты вер. Мүн, шуши мирлүв, увәс мүйевн сема питсүв, тәта енумсүв па ин тәмхәтл вәлдүв. Йистәлдн вән хуятлүв хүл ведпәслуман вәсәт, мүн щит вера вәндтәсыюв. Ар ол мәр Сүмәтвошн хүл комбинат рәпитәс, хувәншәк щит ләп тәхәрсү. Давәрта йис. Лапкайн хүл иса әнтәм, вошаң мира па хулаца хүл вүты. Щи нумәсн мүн 70 кубометра потум дәрәщ омәссүв. Щәлта хүл ванышты, ая шүкатты, судыты, кавәртты па па щирн дэщятты вер пәта немасыя 40 метра луват тәхи ищи версүв. Щиты



▲ Л.Л. Бабанин эвәд пилд редакциява юхтылҕсаңән

тәмхәтл Сүмәтвошн вәдты мир хүл еша павәтты веритләт. Хүл эвәлт мүн интәм тәп 15-сыр дәтут дэщятлүв, щит пельменят, котлетәт, ая шүкатум хүл, сорт мухәл, полт юх пәсаңән щәңхилүв па коллодка щирн сулылүв па па щирн хүләң дәтут верлүв, – амтәңа лупл Леонид Леонидович.

Щиты рәт Сүмәтвошн путрәт хәншты Бабанин ики лапкайт тумпийн «Кораблик» немуп хәтл мәр пушхәт давәлдты хота па Сүмәтвошаң район пәльниная хүл дәтут тыныйл. Щәлта Советской па Югорск вошңән мир Бабанин щирн дэщятум хүл дәтты веритләт.

Хүл дәтут вера тынәң әнтә, и кила – 220 шойта тәп юхәтл. Тәм араттыя лапкайн еша па вухн пунды, ийха – 270 шойт вух питл.

Елды хүл дэщятты тәхи кәщя вет щирн верум хүл консервайт есәлтты дәңхәл. Әмәщ, хуты тәм тәхийн тәп кәт хәннехә рәпитл, итл – рәпатнек, кимит – кәщя хә Леонид Бабанин. Тәм пүш лүв атәлт 11 тонна арат хүл ведпәсләс.

Леонид Бабанин ястәс, хуты айкемн хүл лүв эвәлт 5 кила дант верәс. Щитл Сәрханл вош щишкүрек енмәлтты тәхийн яма нух вантсы па и кила щимәщ лант 100 шойт арат вухн пунсы. Елды тәм вер яма ки мәнл, Леонид Бабанин нюр иса хүл, рүщ щирн «безотходное производство» дәтута мәнл. Итәх ех хүл дант хот воя витамин юкана мәләт.

Хүл дэщятты тәхи тумпийн Леонид Бабанин кимит айкел па павтәс. «Мир Севера» российской журнал хуца па «Роман-журнал XXI век» непекн «Вүт кәрта тәты рәт әш» немуп олаңмит глава «Тәрум мәләң әхтыин» йилуп киникая нух хәншсы. Шуши мир йис верәт олаңән мет тәса хәншты щира Леонид Бабанин айкеләт дэщятты хәнты неңие, оса рәпата тәты хуятые Ульяна Данило (Молданова) вохиләс. Вантә, Ульянаев хәнты па юрн мирнән йис вәлүпсы верәт яма па тәса вәлдә.

Путәр хәншәс:
Ирина Самсонова



Ван хэтлуп тылэщ 21-22-мит хэтлнән Москва вошн Россия мўв луваттын январемэт рэт па рўщ ясаңа вэндтэты 40 хуят XV-мит вэн кәсупсыя әктәщсәт. Вэндтэты верәт тэты хәннехуятат күтәдн вер хўват кәссәт. Тәм ванән ши мирхот мўвтел мир немн пунсы. Вантэ, Россия мўв тумпийн кәсупсийн Белоруссия, Луганской па Донецкой Народной Республикайңан, Казахстан мўвәт эвәлт январемэт вэндтэты ех па вәсәт.

Вухаль хә Россия мўв рәт ясаңа вэндтэты ех күтн нух питәс

Кўш рўщ ясаңа, кўш рәт ясаңа па литературая вэндтэты хәннехә – вән па мосты рәпата тәл. Айтәдн январемлўв шуши мир йис вәлупсы, йис верәтоләнән вэндтәлүйт, дәдн пушхәт вәна йитәдн мўң округев па иса Россия мўвев йис верәт оланән йма ат вәсәт.

Мосл ястәты, тәм кәсупсы хәлум щирн ләщәтман вәс. Оланмит – лыпәт хойты тылэщ вўш эвәлт Ас потты тылэщ вәнә интернет хўватонлайн щирн. Кимит – иши интернет хўват, тәп васы мәнты па Ас потты тылэщнән. Тәм пурайн арталәты ех дыв рәпатаел олңитсәт. Хәдмит – ван хәтлуп тылэщн кашәң мўвн нух питум хәйт-неңәт Москва хон вошн ләщәтум вулаң вандтэты хәра әктәщсәт.

Югра мўв эвәлт щив Ёмвошәң «Лыләң союм» хуща январемәт шуши мир йис верәта па рәт ясаңа вэндтэты вухаль хә Владимир Меров яңхәс.

Кашәң хәя муй неңә 15 минута мәр мосәс вәндтэты вер әмщә па нумсәңа вандтэты. Сырыя дыв путәртсәт, хута сема питсәт, хән рәпитты олңитсәт, щәлдта яксәт, арисәт. Ши юпийн рәт ясаң урок тәсәт. Дыв вандтәсәт, муй щирн январемәт рәт ясаңа вәндтәләт па хутыса әмщә урокдәл ләщәтләт. Юхи хәщум хәтлән ши вән мирхотн нух питум ех

ишәксийт па мойләсийт. Шеңк ям, хән щимәщ вәйтәнтупсәт ләщәтлүйт, вантэ, кәсупсы хўват мет нумсәң па әмәщ вәндтэты хуятлўв оланән уша павәтлўв. Ши тумпийн кашәң кәсты хәннехә әнтә тәп лўв ләщәтум урокдәл па мастер-классдәл арталәты еха вандтәл, па хуят мәты урокәт иши йма вантәт па нумса пунләт, хутыса йилуп щирн январемет вәндтэты рәхл.

Щиты «Рәт ясаңа январемәт вәндтэты хуят – щит йис верәт тәса вәты хәннехә» немн Владимир Савельевич Меров нух питәс.

Шуши мир культурая вәндтэты вухаль хә Владимир Меров 2007-мит ол вўш эвәлт «Лыләң союм» тәхийн пушхәт вәндтуман вәл. Лўв Сўмәтвош район Саранпауль кәртән сема питәс, щәта енмәс па әшколайн вәндтыләс. Айтәдн Дмитрий Агеев хуща нарәсты, ариты па якты верәта вәндтыләс. Ши тумпи Владимир Меров «Пўпи якты хот» пурайн ёмәң арәт ариты па ёмәң якәт якты йма хошл.

» «Рәт ясаң» немпи урок ма увәс мир нарәсты юхәтн юнтты, ши юхәт вандтэты, ариты па якты верәт алыты щирн ләщәтты нәмәссум. Мәнәма мосәс нюр па ясәнуп январемәт итәх вухаль ясаңа вәндтэты, дәдн дыв нарәсты юхәт



В.С. Меров



В.С. Меров вухаль мир як вандтәл

немәт тәп вухаль ясаңән нумса әт пунсәт. Муй щирн тум муй тәм нарәсты юхәт алылүйт, мәта еха щитн нарәсты рәхл па муйсәр нарәсты сыйт кашәң ут тайл.

тайңәнән рәпитты ех, нух питум Владимира Мерова ям ясаңәт луплўв. Елды ищиты йма па апрәңа вулаң вердәл, ат тәл!

Мўң, «Хәнты ясаң» па «Луима сәрипос» газе-

Путәр хәншәс: Ирина Самсонова



Неңәт ёнтум тўтщанәң ванлтупсы вәс

Тәта мосванән ван хәтлуп тыләщ сухәнтты кәмн Сүмәтвош районән, декоративно-прикладной творчества па шуши мирәт хот йитн вәлты па рәпитты неңәт немасыя хурамәң ванлтупсы ләщәтсәт па щимәщ немн лүвел юкәнтсәт «Сүмәтвошәң верәнтты неңәт ёнтум тўтщанәт».

Тўтщанәт тәса па хурамәңа ёнтты верәт тәм йисн леваса ән вәйтлүв. Сырыя, вантә, хәнты муй вухаль неңәт шеңк яма па тўнщирәңа ши ай хирәт ёнтсәт. Муй араткәм верәнтты неңәт ши йис пураитн мўң увәс мўвевн вәс, ши арат тәса хәншийн эвтум, ёшн ёнтум па арсыр щел вух картыйн лыв эвәлтәда керәтман ләщәтум тўтщанәт ищи имет тайсәт.



▲ Р.П. Загородняя ёнтум хәнты не ёрнас па тўтщан хире

Тўтщан – щит кашәң хәтл мәр па кашәң неңән иса лүв хошты щирәлн верум ёнтәсты хир. Сырыя мәнум оләтн тўтщанәт па вўлы кепләт муй ямсыева ләптамтум панне па сорт хўлңән, нәй сухәт эвәлт ләщәтсыйт.

Итәх утәт немасыя арсыр хәншәң кепәл шўкәт эвәлт ийха әкәтсыйт па хурамәңа ёнтсыйт. Ши тумпийн кашәң верәнтты не лүв рәтәл-щирәл хәншет тўтщанәда эвтәс, ләлн ши унтасн арсыр хуятәтн ушәңа версы, муй хурасуп рәт эвәлт лүв вәл. Советской ләщ оләтн хәнты тўтщанәт керәтман щел вух эвәлт верум картыйн пунты питсыйт. Щимәщ верәт унтасн, хән тәм муй тум ёнтәсты не лүв ай хирәла күншемәл, ин утл па әл ләрыйл, мәтты щив иса сыяң ләңханьщупиет нух ихәтман тайлдыт.

Шуши мирлүв хәннехуятәт, вантә, лыв щирелн хурамәң верәт оләңән нәмәссәт. Хурамәң не мет оләңән – щит тәса



▲ Л.А. Артанзеева ёнтум тўтщанәт

ёнтәсты муй па верәнтты не, хотәл лыпийн па камн кашәң ләмәтсх муй пурмәсые иса шакаңа тайләлә, нявремләл яма енмәлтәл па лыв оләлн сырыя нумәслад тәл.

Ши пәта йис вўшәтн мень не тўвум пурайн мет оләңән лүв иикел әңки тўнщирәңа арталәс: веритл муй әнтә ши неңәл ләмәтсхәт тәса па яма ёнтты, летут кавәртты, сыр-сыр хотәң рәпатайт ләщәтты, каркам муй па янүв ёшәң-кўрәң мень неңәл лүвела ликмәс. Щәлта па мень неңәл ёнтум тўтщан хирәт вантәс: яма муй тәпәла щитәт ай не сырыя ёнтәс.



▲ Сүмәтвош район шуши мирәт тәхи хуща рәпитты неңәт

Тәп тәпәла верум тўтщан хир ши вән ими семңәлада ки питәс, щит па лүв щимәщ мень не хотәла лунәлты каш ән па тайс па па тәхия кимит ай не кәншты ищи кўрумн мәнәс. Ши пәта кашәң хәнты эви 14 муй 17 ола юхәтты вўш вәнты кәтхәлум тўтщан хир па лүвела тәса ләщәтәс.

Мет оләң тўтщан хир эвел пәта па әңкелн тўнщирәңа ёнтсы. Щәлта па кимит муй хәлмит тўтщанәт лүв хошты щирәлн айлта хурамәңа верәс.

Кашәң щәшкан пўлые, кепәл муй вәнт вой сух шўкәт араттелн хулығыа ийха неңәтн әкәтсыйт па лыв ёнтәсты тўтщан хирләда пунсыйт.

«Сүмәтвошәң верәнтты неңәт ёнтум тўтщанәт»

ванлтупсыйн ин рәхл шеңк хурамәң тўтщан хирет Раиса Загородняя (Рябчикова) верәнтты неңев хуща шиваләты па вантты. Вантә, ши неңев йис пураитн вәлум хәнты неңәт щирн тәса кашәң пурмәс ләщәтл. Ши тумпийн лүв панне хўл сух па нәй эвәлт ищиты тўтщанәт ёнтәс. Ям, тәс тўтщанәт Лидия Артанзеева па Галина Руденко хурамәңа нәй сухәт эвәлт версәт.

Кашәң щимәщ не верум пурмәсыет ванлтупсыйн хурамәңа вантәссәт.

Любовь Вынгилева
китум айкел
хәнты ясаңа тулмащтәс:

Владимир Енов



▲ Еплдэ воньшумут а́кәттәт



▲ Имет вәнта мәнты а́ктәщийлдәт

Воньшумут а́кәтты вер

– Күрдам, шанш йитдам кәшет, атәлн вевтама улсум, – аңқаңкем хотхәрийн омәсман па күрдал айлтыева вошхиман путәртәл. Эвидал лүв пиләда кашашман, пуртәнән мәды. Тәп мұң, нявремәт, лүведа ән эвәллүв. Нәмәслүв, хуты мулхатл вәнта воньшумут а́кәтты йңхсүв, немәлт күрңәл, ән кәшитсәт. Лүв юпелн вурайн щи хәхәлсүв, щи мурта вәнт хүват сора шәшл.

Мет сора лүв нәрум хүват мәнл. Хән мәрәх а́кәтты йңхлүв, нямәлт па пелңа щи мурта ар вәлләл. Щи мурта рүвәң хәтл питыйл, нямәлтәт уңда, пәда луңләт, пуршантләт. Еллүв, веншлүв, ешлүв күншләлүв, йиңк яньщты ләңхалүв. Аңқаңкем пелы вантыйллүв, хән лупәл, тәмхәтл тәрмәл, юхи мәнлүв. Тәп лүв нямәлт па рүв пелы иса вүрл антәм, воньшумут а́кәтман нәрум хүват шәшл. Щи пурайн мулты путәртты, юхи вохантты шир антәм. Лүв тәп юхлы лупәл: «Хәтл худна нәмн!», муй па «Щи арат мәрәх семие – а́кта!».

Лүв мұңев вәнтән немәлт пурайн ән кәншсәлэ, ант үвсәлэ, вәнтән үвты ән рәхл.

Мұң саттәва лүв пүңләдн ванән ат вәсүв. Шеңк вана йиты ищи ән рәхәс. Хән шеңк вана питлән, лүв тәп нәхмәл: «Муя нюл елпия луңсән?». Мет йм вер, хән шай яньщты

омәслүв. Сорум ай юх нүвәт а́кәтлүв, рат хәр верлүв, шай кавәртты пүт эхәтлүв. Хән шай кавәрмал, ил омәслүв па әмәшдуман шай яньшлүв. Шаев щи мурта еплдә, сорум калашлүв шәмши шая хәнтыйлләлүв, дөпта па еплдәңа йиләт.

Хүв омәсты ән рәхл. Аңқаңкевн хүв омәсты хән мәлыюв. Мұң рат хәрәв йиңки түңкән пундәв, хәрәтләв па елды воньшумут а́кәтты пиньщәлүв. Пушум мәрәх ймсыева ләлүв. Щи мурта еплдәң!

Воньшумут а́кәтты пурайн аңқаңкев иса щи вәнта йңхәл. Еша вәл вүрты воньшумут етшәл, щәлта хумәсвәл, әм а́кәтты пура юхәтл. Тохтәңвәл па сәвупсы ән а́ктәс, щи воньшумутәт пәта ар саккар мосл. Лүң мәр аңқаңкев вәнт хүват и километра хән шәшл, ар воньшумут юхи тәл. Тәм мәр кәшаң күрңәл, ола-

нән немәлт ән па лупийл. Әхәтшәк щи олаңән нәмәлмәл.

Лүв эвидал ищиты щи, воньшумут а́кәтты вер пелы хәршет вәсәт. Хилнедал па мет ай хилнедал ищи воньшумутәт а́кәтман вәнтән йңхләт. Увәс мұвн вәлты имет щимәщ шир щи тәйләт. Хотәң вердал әхәтшәк верләлдал. Мет сыры вәнта йңхты мосл.

Имет етн вәнты вева йиләт, вәнт эвәлт мәшьяя шәшләт. Хинтләл теләңа воньшумутн а́кәтмел. Хинта ән луңум утләл ай хира пунман элты йирсәдал. Сүсн сора пәтлама йил, щи пәта юхлы йитәлн дыв лавләсман айлтыева шәшләт. Вәнт әшәт хүват мәнман ймсыева ил вантләт, дәдн воньшумутләл, ара ал шошумты. Хән тәп вәнта мәнләт, ил питум юх элты вүшмийлләт. Юхлы йитәлн ил питум юх мухәләя йңхийлләт, күрдал вева йиләт па шәпи вүшты лавәрт. Муйкем вана шәк кәрта юхәтлән, щикем сора

юхи вүратлән, каврум шай яньщты па рүтьщәты.

Имудтыйн и пилнеңев Анна Леонтьевна Молданова хинтәл еңхсәлэ па мұва омсәлсәлэ. Щәлта айлтыева нух сорум па еша йиңк тайты әрам кимла мәнәс, щәта нәлкәт вәщийлләт. Лүв ил нюрумтәс, еш пәтыя щи нәлкәт әмәртсәлэ па юхан кимла мәнәс. Щәта щи нәлкәт юхан йиңка есәлсәлдә. Мұң лүв пеләда вантман щикүш вева йисүв, хинтлүв ил омсәлсәлүв па нәтты щи мәнсүв. Хутыса лүв пәтлама йиты артән щи нәлкәт шиваләслә па хулща әр вүс – уш антәм?!

Щиты айкемн вәнта ювум хуятлүвн, воньшумут а́кәтман вәнта йңхты мәрәвн, мұвев-йиңкев шавиман тайты вәндтәсыюв.

Антонина Ледкова хәншум путәр хәнты ясаңа тулмащтәс:
Надежда Вах



Хулта ма эшем мәнл...

Ван хәтлуп тыләщ 22-митн катра йис пурмәсәт шавиты «Торум Маа» тәхийн «Хулта ма эшем мәнл...» лүңәттү вәйтәнтүпсы верәнтсы. Щәтә хәнты мир поэт хә Матвей Новьюхов оләңән путәр вәс.

Лүв Сүмәтвош районнән Түтлейм кәртән 1928-мит олд хәнты хоттелд ех хуща сема питәс. Нивд класс етшуптумад юпийн вәлүпсы эш хүват шәшмәс. Матвей Иванович сәмл дьпийн стихәт тывты питсәт. Лүв рәт мұвәд па сәма рәхты эхләд оләңән хәншәс. Вәлүпсәлдн арсыр суртәң ширәт тывийлдсәт, тәп стихәт хәншты вердән вәтшәслә. 1969-мит олдн Нягань воша юхтәс, рәпәтә вәйтәс па хотәң эхләд пида тәтә вәлты питәс.

М. Новьюхов хәншум стихләд киникая әнтәма ювмал, юпийн велщи версийт. Хәнты лүв путәртылдәс, хуты тәп әнтәма йитал, юпийн поэта лү-


ңәттү питла па стихләд уша вердыйт. Яна щи, щиты щи тывәс.

Зоя Фёдоровна имәдә вән пәмәшипа ясаң лупты мосл. Ищиты Нягань вош музейно-культурной центр хуятәт, Тюменской государственной университетн рәпитты хәннехуятәт, вошәң кәщә эх нәтсәт. Хәншум утләд похла әкәтсийт па эхәт мет оләң киника «Куда мой путь лежит» тывәс. Кимит киникайл «С надеждой на счастье» депутат хә Е. Айпин нәтүм вух унтасн етәс. Ин поэт хә эшн хәншум непекләд Нягань вош музей хотәң хущи вәлләт. Иса Матвей Иванович ветсоткем стих хәншәс.

Вәйтәнтүпсы пурайн М. Новьюхов вәлүпсы па стихәт хәншты вер оләңән Нягань вош музейно-культурной тәхийн рәпитты нәңңән Олеся Левицкая па Зоя Проскурякова путәртсәңән.

Ищиты поэт хә оләңән йм яснәт лупсәңән филологической наукайт доктор, профессор хә Юрий Дворяшин па филологической наукайт кандидат, Россия писателәт тәхия луңты хуят Михаил Рябий. Лын путәртсәңән, хуты кашәң хәннехә Матвей Новьюхов стихәт хущи лүв пәтәдә мосты ут вәйтты веритл.

Ас-угорской институтн рәпитты нә Виктория Сязи научной ширн хәншум



М.И. Новьюхов

стихләд оләңән путәртәс. «Торум Маа» музейн рәпитты нә Раиса Решетникова ищи Түтлейм кәртән сема питәс, лүв хәнты «Хәнты ясаң» газетәин поэт хә оләңән хәншилдәс. Кәртәң хуятәт пида вәйтәнтүлдәс па М. Новьюхов оләңән уша верәс. Юхи хәщум күтн Шапша кәрт нявремәт М. Новьюхов стихәт лүңәтсәт.

Путәр хәншәс:
Надежда Вах

Хәтл, етты пеләк хәнтәт йис вәлүпсы

Щимәщ нем тәйл киника, мәтә ут оләңән мұң ван хәтлуп тыләщ 23-мит хәтлән «Торум Маа» музейн уша версүв. Щит кәтңән хәншсәңән: философской наукайт доктор, А.И. Герцен немуп Российской государственной педагогической университет профессор хә Игорь Леонтьевич Набок (Санкт-Петербург вош) па культурология кандидат нә, округ вәндләтәти вер тәти институт доцент Наталья Ивановна Величко (Емвош).

Тәм вәйтәнтүпсы «Торум Маа» музей научной рәпатнек Наталья Краснопева пүншәс:

» Тәмхәтл Наталья Величко монография непекәд оләңән путәртты питл. Лүв 1998-мит олд вүш эвәлд 2004-мит олд вәнты «Торум Маа» немпи катра пурмәсәт давәлдты хотн рәпитман хәтл етты пеләк хәнтәт йис вәлүпсы оләңән уша верәс. Щи арат олд мәр лүв щи хәнтәт арсыр йис пурмәсәт әктәс, ймсыева нух хәншәс. Интәм мұң щи пурмәсәт вошәң па мойң эха альдүв па путәртлүв.

Наталья Величко лупәс, тәм монография непекн хәтл, етты пеләк

хәнтәт йис вәлүпсы оләңән хәншман вәл, дыв күтуп Ас па Юхан, Вах, па Васюган юханәт хонәңән вәлдәт. Лыв вәлүпсәлд оләңән уша верты мосл, вантә, тәм йисн щит вәтшәлүв.

Тәм киникайн хәлүм глава вәл:

1. Этнической культура феномен.
2. Хәтл, етты пеләк хәнтәт пурмәсәт.
3. Хәтл, етты пеләк хәнтәт йис вәлүпсы.

» Тәм дерамтты утн арсыр наукайт ийха хойлдәт. Муй тәм рәпәтайн нух вантсүв? Муй хәнтәт йистәлдн давәлдман тәйлдәт. Тәм вер елды ищи дерамтты питлды. Киникайн йис вәлүпсы, Пүпи якты хот, хәнты



» Н.И. Величко. Л. Гурьева верум хур хәншәт оләңән еша хәншлүм. Тәм киника Увәс мирәт вәлүпсы дерамтты учәной эха, культурологәтә па этнографәтә мет мосл, – Н.И. Величко ястәс.

Вәйтәнтүпсыин мойң эх Наталья Ивановна Величко ар хошум яснәт лупсәт, дәлдн лүв елды наука ширн ат рәпитәс.

Путәр хәншәс: **Людмила Гурьева**



Тәм йис вер олаңан моньщ



Йилуп од ёмәңхәтләт пурайн «Хәтл» нәмпи ханты па вухаль мирңан театр ёх «Югорка. Телепортация» нәмпи моньщ алысәт.

Тәм моньщан Ишки Ики «Тик-Ток» нәмпи социальной сеть хуцца мосты утәт вантты веритл, нух хәншты па щив китты па альты, лоньщан пухие йога верман нумсаңа па щомәңа йил, Югорка похатур имухты па ипүляң па тәхетн тывты хошл. Тәп моньщан атум утәт ищи вәлләт, дыв Йилуп од постәты ән ләңхәләт па иса муй верләт, ләдн па ёх ищи Йилуп од ёмәңхәтл ән постәсәт.

Тигр вое юхтәс, лоньщан пухие па Ишки ики хилнеңие уша верты ән веритләңән, муйсәр вой па муй пәта лүв юхтәс. 2022-мит од китайской щирн «Тигр тәл», щи пәта тәм вое юхтәс.

Щәлдта тәм вой хулт пелы вәшәс. Ишки Ики телепортация щирн Югорка похатур лүвел кәншты китсәлэ.

Карәң ими мәшәң пең-

кәл пида юхтәс па ниңхәртәл: «Пеңкем кәши-кәши, а-на-на-ём, хуты верты?» Югорка похатур лупәс: «Ма нәң пеңкен сәхтәдем». Карәң ими имухты пакнәс: «Ән мосл, ән мосл!» Тәп Югорка похатур – ущмарәң хә, хәнәя лүв пеңкәл сәхтәслэ.

Щәлдта хорахши хә юхтәс па Ишки Ики хилнеңие лолумсәлэ. Югорка похатур лүвел кәншты мәнәс па вәйтсәлэ.

Тигр вой щикүш лыкащман яңхәс. Муйң велщи вантсүв, хутыса Ишки Ики молупщи еңхәс па тигр вой пида тарандәс па нух питәс.

Арсыр әмәщ верәт тәм моньщан вантләты.

Юхи хәщум артән иса йа йис, хорахши хә йа икия йис. Ийха әктәщман Йилуп од ёмәңхәтл постәсәт.

Путәр хәншәс па хурәт верәс:
Людмила Шульгина





Мет ям путәр



«Иис картат вәлупсы» немпи нявремәт пәта ләщәтум кәсупсы сунһәс. Сүмәтвош, Нуви сәңхум, Нижневартонской, Ёмвош районәт, Ёмвош, Мегион вошһән эвәлт эвет-пухәт хәнты ясәһән 21 путәр китсәт, дывела вән пәмәщипа луплүв. Аңкета-ащета, вәнлтәты ёха ищи вән пәмәщипа ястәлүв, хути нявремәта әмәщ путрәт хәншты нәтсәт.

6-12 ол дуват нявремәт күтн Игрим картәң эви Анастасия Новьюхова (12 ол) оләңмит тәхия питәс. Ин лүв путрәл, лүңәттты веритләты.

Игрим – щит ма рәт вошиём

Ма рәт вошиём оләһән хәншты ләңхалум, тәта ма сема питсум, вәллум. Щит сәмема мосты Игрим вошиём, Сүмәтвош районән Ёмвош округн вәл. Лүв Увәс Лев юхан хонәһән омәсл.

ХІХ-мит нәпәтн катра непекәтн велщи хәншман вәс, щипурайн хәншсы – Егрим, Ягрим, Игрюмской юрта, Егрим нәл. Тәта йистелн хул па вой велпәс-луман хәнтәт па вухалят вәсәт. Лупды, мәтты ки Игрим нем Ас вухалят ясәң эвәлт тывәс. Итәх хуятәт лупләт, хути ягр – щит мәләң, па ёх ясәт щирн, юхрим – күтари кейл.

1902-мит олн тәта Бешкильцев щурас хә вәлты питәс, лүв шуши мир эвәлт хул па тынәң вой сух дәтыләс па елды тынылдәлә. Тәм пура вәнты тәта Бешкильцевәт вәлләт.

1926-мит олн Игрим карт Сүмәтвош совета дуңәс. 1930-мит оләтн тыв СССР па мұвәт эвәлт нәртәмды китум ёх тәть-лясыт. Щипурайн тәта хул завод пүншсы, рәпитум

ёх хотәт омәсты питсәт. Тәм вош Игрим-Ледник (Игрим-Луговой) немн пунсы.

1932-мит олн Анеевской сельсовет тывәс, әхәт 1959-мит олн Игримской сельсовет пүншсы.

Вулаң Отечественной далә пурайн мұң картәв эвәлт Гавриил Епифанович Собянин даләты мәнәс, лүв тәса пушкан эвәлт есләс, Советской Союз Героя йис. Лүв 1936-мит олн Игрим вошевн хул артель кәщая вәс. Мұң 1-мит ашколаев пүнәлн Г.Е. Собянин кев хурас вәл, ванкүтлы щив әня лыпәт пунлүв. Игримн лүв рәтләл, вәлләт.

Игрим-Ледник карт ванкүтлы вән йиңкән епәтыйлдәс, щирн 1950-мит олн щипурайн карт ләп тәхәрсы. Елды па тәхетн, вәнтәт күтн йилуп Игрим-Горной омәсты питсы.

Мұв идли газ вәйтум пурайн ар месторождение тәхи тывәс, щирн ван хәтлуптыләщ 3-мит хәтлән 1964-мит олн Игрим вош «рабочий картә» йис па вошәң совет версы. Щипурайн тәта арсыр йилуп хотәт омәсты питсыт.

1960-мит ол вүш эвәлт 2000-мит ол вәнты Игрим



Игрим вош хурасәт

вош вет пұша вәншәка йис. Юхи хәщум оләтн арсыр тәхет ләп тәхәрсыт, щирн мир рәпата кәншман па вошәта вәлты па рәпитты мәнсәт.

Игрим вошевн щимәщ тәхет вәлләт: Тәрум хот; культура хот; арсыр искусствайта вәнлтәты ашкола; колледж; «Олимпиец» немпи әрәңа-щомәңа йиты хот; щомәңа па тумтака йиты тәхи; «Игрим» немпи тухләң холәт юхәтты хот; СССР Героя Гавриил Епифанович Собянин кев хурас.

Ма аңкем-ащем – шуши мир эвәлт вәлләһән, ащем – вухалә хә, лүв Ванзетур картән сема питәс, аңкем

– хәнты нә, лүв Ямал хуца Щаня мұвн сема питәс.

Мұң вошевн шуши мир община вәл, щәта рәпитты ёх хул велпәсәләт. Щитумпи мұң хуцева Шуши мир хот рәпитл, щәта мұң ёшн арсыр хурамәң, пур-мәсәт верлүв, хәнты па вухалә мирһән юнтупсәт юнтлүв. Ма «Увәс неңие» тәхия яңхлум, щәта рәт ясәң вәнлтәлум.

Игрим – хурамәң, сыс-там вошие, ма лүвөл мосман тәйләм. Мұң хуцева мойңа юхтаты! Ма нынана иса вошем альдум.

Тәм лопас ләщәтәс:
Людмила Лонгортова

Ханты ясанг
(Хантыйское слово)
№1 (3589), 13.01.2022

Соучредители
Дума, Правительство
Ханты-Мансийского
автономного округа – Югры
Издатель
Департамент общественных
и внешних связей Ханты-
Мансийского автономного
округа – Югры

Редакция

Директор, главный редактор –
Динисламова С.С.
Телефон (3467) 33-22-72

Заместитель главного
редактора – **Вах Н.И.**
Телефон (3467) 33-24-02

Ответственный секретарь –
Рагимова Н.В.
Телефон (3467) 33-24-02

Адрес редакции и издателя:

628011, г. Ханты-Мансийск,
ул. Комсомольская, 31
тел./факс (3467) 33-17-52

E-mail: gazeta@khanty-yasang.ru
Газета размещена на сайте
www.khanty-yasang.ru

Отпечатано:

ООО «Новости Югры-
Производство» г. Сургут,
ул. Маяковского, 14.

Индексы 04393, 54393

Тираж **2166** экз.
Заказ **49**
Цена свободная

Газета
зарегистрирована
Управлением Федеральной
службы по надзору в
сфере связи,
информационных технологий
и массовых коммуникаций по

Тюменской области,
ХМАО-Югре и ЯНАО.

12+

Свидетельство о регистрации
ПИ №ТУ 72-00796
от 23 января 2013 г.

Мнение авторов публикаций
не обязательно отражает
точку зрения редакции.